

جمعية الأدباء

كتاب الأدباء

(١)

أشعار مصرية

قصائد الفائزين

في مسابقة (٢٠٠٣)

جمعية الأدباء

١٠٤ ش قصر العيني

كتاب الأدباء - الفائزون لعام ٢٠٠٣

محمد التهامي	رئيس مجلس الإدارة
أحمد سويلم	نائب الرئيس
د. يسرى العزب	السكرتير العام
نهاد شريف	أمين الصندوق
فتحى سلامة	مقرر لجنة الإعلام والنشر
رفقى بدوى	مقرر لجنة الجوائز

حقوق الطبع محفوظة

جمعية الأدباء

١٠٤ ش قصر العيني

رسالة جمعية الأدباء

تحمل جمعية الأدباء مشاعل الثقافة متمثلة فى فنون الكلمة أدبا وعلما نثرا وشعرا وقصة ونقدا ومسرحية ورواية.. وتحاول جهد الطاقة المتاحة أن تضىء بالكلمة الرائعة أعماق المتلقين وان تتابعهم بها أينما كانوا ما استطاعت لتزوين لهم العطاء الثقافى إبداعا واستقبالا وتغريهم به وتدفعهم إليه وتحببهم فيه.

ومن وسائل الجمعية إلى ذلك عقد المسابقات التى تثير المواهب وتزكى المنافسات وتستحث القدرات على الاجادة والتفوق.. وبها ينال النابغون بعض ما يستحقون ماديا ومعنويا ابتغاء مرضاتهم بأن المجتمع يحتضنهم ويرعاهم مما يضاعف عطاءهم.

ثم تحمل الجمعية هذا العطاء المتفوق صحفا وكتباً تطوف بها على القراء بأيسر الاسعار لتكون زادا ثقافيا وثمارا ناضجة أدبية وعلمية دانية القطوف تتيح للمسيرة الثقافية زادا وزوادها وتوفر للثقافة الرفيعة الوسيلة التى تمكنها من صياغة أعماق المتلقين صياغة مثقفة رفيعة

تجعل من الانسان أداة فاعلة فى التطور إلى ما هو أحسن
ثقافيا وعلميا وأديبا وبالتالي انتاجا فى جميع الوجوه
المدنية والحضارية.

تحاول جمعية الأدباء أن تجعل من الطاقة البشرية وهى
العنصر الأساسى فى التقدم فى الحياة أداة فاعلة أقصى
الفعالية بدلا من أن تكون عبئا ثقيلا تنوء به الدول
الناهضة التى تلهث وراء توفير الحاجات الضرورية.
وتبذل الجمعية فى هذا المجال أقصى جهد أعضائها عن
إيمان وصدق وإخلاص ونكران للذات معتمدة على الله
شاكرة ما يتاح لها من عون فى أى مجال من المجالات.
والله سبحانه وتعالى لا يضيع أجر من أحسن عملا..

محمد التهامي

رئيس الجمعية

تقديم

يسعد جمعية الأدباء أن يكون أول مطبوعاتها كتاباً شعرياً يتضمن نماذج جيدة لشعراء جيدين تقدموا للمسابقة الأولى في الشعر التي أنجزتها الجمعية في عام ٢٠٠٣.

وفي هذا الديوان نجد مختارات من شعر العامية الذي فاز في العام الماضي في كل من مسابقة الديوان العامي والقصيدة العامية، ليكون هذا الديوان احتفالاً بالمتميزين واحتفاءً بفوزهم بالمراكز الأولى في المسابقة.. متمنين لهم مزيداً من التفوق والتقدم، ولغيرهم من المواهب الشعرية أن يفوزوا في مسابقات قادمة تقيمها الجمعية.

ولا تنسى الجمعية اليد البيضاء التي تمدها وزارة الثقافة متمثلة في صندوق التنمية الثقافية لدعم النشاط الثقافي بالجمعية، ولذا يكون واجباً أن نتجه بالشكر لراعى الثقافة في بلادنا الوزير الفنان: فاروق حسنى متمنين لسيادته مزيداً من الصحة والعافية.. وللثقافة على يديه مزيداً من الازدهار.

دكتور يسرى العزب

سكرتير عام الجمعية

قصائد: على شجرة من ديوانه:

(نبين زين)

الصادر عام ٢٠٠٠

والفائز بالمركز الأول

قولی القصاید

دحرج لی زمن الودع
ورماه علی بحوری
وقال لی شوف یا جدع
مهر الودع فوری
غاوی وعایز سمع
ادفع وخذ شوری
وشوش وبوح للودع
بالسرفی حضوری
نطق بأهة فزع
خلعتنی بجدوری
وضاع معاها السمع
وسنینی وشهوری
بکی الزمن والودع
وعرفت مقدوری
دوری یا دنیا العجب
یا مهدمة قصوری
عارفة اللى كان السبب
واللى حلب طورى

والكاس مراره انشرب
والنية تدميري
ابنى المراكب يا نوح
وقول لها سيرى
ما عادش نافع كلامى
وفقدت تأثيرى
عجبنى يا دنيا العجب
أزقق ولا تجيرى
ضيعت ليه همتى
وقفت ليه سيرى
❖ ❖ ❖
وحلفت لك يا قلم
بأيمانك الله
لا كتب عن اللى انظلم
فيها وقال الآه
آه تقول شكوته
تسابيح تقول الله
رب العباد يسمعه

ويسألك في سماه

سكت ليه يا قلم

اكتب وخاف الله

❖ ❖ ❖

وانت يا ست الحبايب

صلى صلاة غايب

على روح محب اندبح

عاشق مازال دايب

قومي وقولي القصايد

عطشان انا لشعرك

وما تخافيش من العسس

لو كانوا عدد شعرك

هو أنت سارقه البلد

والا طاطيتي لحد

مفهوم كلامك يا حرة

ميزانه عدل وجد

كلمة تخلي الشفايف

ترسل طاقات من نور

فضحت بيها بشر

واكلينها والعة وزور



مرسوم عليهم غضب
عاشقين خراب الدور
والحكم صادر علينا
والسيف فى إيد «مسرور»
يا اللى كلامك حقايق
وانا م الجمال مسحور
حبسوا لسانى ف قفص
ظالم بنى له سور
مين حزنك يا وطن
الا لثيم موتور؟!

مايو ٢٠٠٠

الرب عمره ما نام

مبنى التجارة وقع
سنوا لنا السكاكين
للمسلمين والعرب
والمؤمنين فى الصين
وف كل حنة تلاقى الظلم متنوع
حاصر وجوع
وشن الحرب باسم الدين
كلمة جهاد تتلغى
من ديننا بالمرّة
ركن الزكاة ننكره
ونموت الفقرا
ممنوع أذان نرفعه
باسم الشيطان نقرا
والحج يبقى لأميركا
والكعبة تبقى هناك
خلى إلهك هوانك
وحى ع المبدأ

ومنين راح ابدأ
وعاملها بس «شارون»
والبصمة واضحة قوى
للصهيونية شئون
ومادمت فاهم غلط
اسعى ف خراب الكون
احرق حمام السلام
بالمسلمين ابدأ
وهات شيطانك حصانك
واهدم الكعبة
فكرها لعبة. فشر
دى الكعبة ليها رب
والرب عمره ما نام

٢٠٠٢/١/١٤

طاسة الخضة

الى ما يعرفك يجهلك
وانا الى عارفك
طالع لابوك
الدم ملى بالخداع
والصهاينة برمجوك
والهدف معروف وواضح
شمس ساطعة ونورها فاضح
وانت مولود هودوك
والحاحام بارك وهو الى اصطفاك
زور الأصوات لصالحك نجحوك
طب ليه جابوك؟
كمل المشوار يا «جورج»
ابتداه من فترة أبوك
لم حلايف التحالف
وانت عارف وانا عارف
إن «شارون» يبقى أخوك
فى الرضاعة.. قد يجوز
فى الصياغة.. هو أصيع ديب عجوز

حُجّة في الإرهاب ومجرم
لعنة في فرض النفوذ
دلدل الحلقان في ودنك
ابك يا حامى الشذوذ
اوعى تفهم إن حصنك فيه مناعة
شوف في ساعة...
جم من المجهول جماعة...
داسوا هيبتك
انعى خيبتك
صلى للصهيون يا واخد ع النطاعة
ستى باعنة لك عيادية
طاسة الخضة هدية
لما تتفرز وتحلم
إن فيه طيارة جاية
اشرب المنقوع بسرعة
قل سماح يا فلسطينية

٢٠٠١/٩/١١

اقروا فائحة أمريكانى


شيعوا يا الله شرفكم
حتى مثواه الأخير
ادعوا أسراب الديابة
يحرسوكم ع السرير
وافضحونا ف كل وادى
بعزقوا ثروة بلادى
والنهاية الكل واقع فى الكمين
هى مين؟
صلوا ليها واسجدوا
سبحوا وقولوا آمين
واشهدوا وانسوا التشهد
يا عرب متأمركين
ويمين وبالله القوى
يا قدس يا مسرى الأمين
لا حاكون كتابة ولا ملك
ولا لعبة تمشى بزملك

ولا يوم معاهم أشرت
أنا حلمي إني أمتلك
ناصية قرارى
ما اسمحش للحية اللعينة تخش دارى
واشوف بنفسى للأمل
مليون بصيص
قلبك ما فيهبش رحمة
فكركم اسود غطيس
من فعلكم
بقى نخلكم
تعبان شريد
فقد الجريد
والطرح صيص
❖ ❖ ❖
ما يهمكوش
اسكروا

مزوا
وناموا
بعد ما تملوا الكروش
علقوا الزينات ولحمى
قولوا بالأحضان يا «بوش»
واكبشوا واملوا خزائنه
دعموا بيها العروش
واحجزوا وانا جيبى فاضى
اسلخوا حتى الوشوش
جهزوا لى جنازة حارة
صنعوا ليها النعوش
واكسوا بيتها الأبيضانى
بالمصاغ الأسمرانى
نهبة م النفط الوفير
واجعلوا القريان شرفكم
فتوى م الحاخام «مائير»
وادعوا تحميكم «أميركا»
واعبدوا الصنم الشهير

واهتمفوا بحياة وريثه
دلعهوه
نن عين عين الصهاينة
وعين أبوه
«بوش الصغير»
واعملوا حفل احتلالكم
نصبوه فيكم أمير
واعلنوا في برلمانكم
القرار أصبح قراره
والخليج أصبح أسير
نجست أرضه النفايا
والحكاية
أمرها جداً خطير
يمحو كلمة أمة واحدة
يسرقوا الروح م العبير
أصلنا ف نظر الصهاينة
أمة أجهل م الحمير
ياما قلنا ألف مرة

السنين الجاية مرة
والفساد بقى عملة حرة
وانتو داخلين السباق
مين يموت طفل عربى؟
مين يلوّث جو عربى؟
مين يبيع الكبرياء؟
هى دى بداية الحكاية
والصهاينة فى اشتياق
يدفنوا الحلم اللى باقى
يطفوا نور الأنبياء
ينشروا بيننا الرذيلة
ننسى مين خلق السماء
يا اللى وليتم وجوهكم
شطر كل الأذعياء
اللى نادوا بالسلام
ورجعوا تانى اغتالوه
من جماجم طفل هاجم بالحجارة
ابنوا لحد وزوقوه



واما ييجى اى زائر
اقروا فاتحة أمريكانى
فهموه
إن جوه اللحد حلمه
لوها يصحى يقتلوه
أصلها فى الأصل لعبة
والسيناريو جوه جعبة
والخازوق جاهز وحتماً
فى النهاية حاتلبسوه

سنة ٢٠٠٠

خدك يا واد ينباس

قلمك فى ايدك وتر
حبرك فى قلمك ماس
لحظة نزول المطر
يستبشروا به الناس
الأرض زى الورق
اكتب على الكراس
من صدق قول الشاعر
يتنفس الإحساس
كلمة بقلم تنكتب
زى ضربة فاس
الأرض تفرح بيها
وتشد أزر الناس
على رأى قول المثل
دول خبطتين فى الراس
قلم يذل العدو
يسقيه مرار الكاس
ويهدد عش العناكب
خلى الكلاب تنداس



من حق هذا البلد
من حق كل الناس
تعرف حقيقتك يا شاعر
خدك يا واد ينباس

٢٠٠٠/٣/٣

خلفة الشياطين

سنين
غرقانة فى الوحلة
سنين فحلة
تعكر فينا
وتفكر
تشل ايدينا
تتنكر
وتنشر سمها التعابين
تغير جلدها واللون
وتخدع كل ناس الكون
وتولد كل يوم كافر
مالوش رجلين
وله حافر
وحامل للشيطان قرابين
ومس الجن لابسها
ملبسها

بطعم الذل والحنضل
وعاملة في كل حته كمين
منين هاتروح ها تلقاها
صواعق غدر في سماها
ودق الرعد موسيقاها
وهي والطوفان واحد
سنين العز ليه راحت؟
وريح الغدر شغالة
شاممها
والأثر باين
وأهي فاحت
يا فاحت ليه تزفني؟
تكفني
وترميني
وتظلمني
أنا عندي

تاريخى واسمى على زندى
وقدرى ان اكون جندى
جدودك شافوا يوم حطين
سمانا وأرضنا طاهرة
وفيهما كتير «صلاح الدين»
وانا مستنى ييجى اليوم
تشوف الضهر كله نجوم
وتنزلى
وتندلى
يا مخزن ذل كله سموم
ما أنا عارفك
وعارف برضه آخرتها
وعارفة الدنيا ندلتها
وقصتها
أثر باقى
على كهوف الهنود الحمر
سنين
ها امسحها من عمرى



واسلم للإله أمرى
يجيب لى الحق م الحية
ويمسح خلفه الشياطين

٢٠٠١/٦/٢١


قصائد: أمل عامر من ديوانها:

(مساحة دفا)

**الصادر عام ٢٠٠٠
والفائز بالمركز الثانى**

كواليس

علقت على الشجرة عيوني
جايز تلمح ضيَ لأنفاسك من فوق
والشوق دوامة بتبلع راحة البال
والقلب شراقي
والعمر الباقي سواقى بتلعب بيها الريح
فى سراب الكون ماتبعترنيش تقاسيم
عواد ووعودك وصلة شوق من غير أنغام
إن غام الضى ف عيني فما تلومنيش
ما اقدرتش أسلسل نور الصبح
سرقتنى الموجه اللى بترقص فى عنيك
وخدتنى لآخر شط مؤلف الأحزان
ما ترشش قمح الحب ف بير عطشان
فتافيت الحلم بتتسحب ل مافيش
مسافات من وقت ميلاد الروح لداك
إن فات من عمرك يوم اوعاك بجنانك تستناه
مسرح وعرايس فوقه تئن سكات



وانا وانت مابين الكواليس
تلقانا ف دمة ما بين موال
نفرح لو يلمس شفايفنا حنان
وشوش القلب فرد بضحكة موت
صوتك محفور بين الكلمات
وملامحك بين السطرين
ماتدورش عليك في قصيدتي
ريحتك في المعنى وفي العنوان

١٩٩٧/٦/٣

حدوتة

على دقة ساعة الجامعة شايفاه بيمد
وبيسبق كل ساعات الكون فى ثوانى
شايل أمله وحلمه وقلمه ف شنطة إيد
وبينكش بعنيه فى الزحمة
وبيسأل كل خيال بيعدى
عن بنت جميلة غير كل بنات الدنيا
فى عنيتها شروق الشمس
وف أيدها غير كل بنات الجامعة
أوراق الغرفة (٨) والرباعيات
بتطير ويتحضن تمثال نهضة مصر
لما بتسمع «أنا لك على طول»
ويتصعب على كل صاحبها لما بتبكي ف «نار»
يجمعهم متر مربع وف دفتر واحد
متكحل كل سطورهم بسهم وقلب

تنقش له ف طرف الورقة باحبيك
ويرد عليها بلمسة إيد وقصيدة شعر
والقانى وانا برة حدود حلمهم الصادق جدا
باتأمل تفاصيلنا الأصغر منهم والقانا شبههم
بس احنا زى اصحاب الحواديت الباهتة يادويك ضى
يرقص يتجمع فى عيون الناس
وف لحظة ما يملوه
يغسلوا ملامحهم بريح باردة وريحة زيف
للمرة الألف بادارى ف خوفى
وف رحلة هذيانى النفسى ها جرح حتى ف روحى
أحسن لى ألحق آخر قطر مسافر يمة قلبك

ديسمبر (١٩٩٧)

لحظة رجوع

مطر الوداد غرق بيوت القلب طرحت شمعدان
باحضن حروف اسمك ويازرعها في شرياني
ما انتاش مجرد لحظة انفعال
ولا زقزقة في القلب عدت والسلام
دا انت ابتسامة الكون
ساعة ما فجر الورد بيفتح عينيه
وانت حواديت البنات السمر
حين ما تغزل طرف أحلامهم عينيك
وانت خطوة نسمة شاردة
فاردة ضل حنانها ع الأيام
وانت وردة بتنطفئ من غير أمل
تضوى ويفتح ضياها من عبيري
لما صوتك حسنى
اتشرنقت أحزاني تماثيل من قزاز
لما قلبك مسنى
خضر الضلمة اللي ساكناني

ومد الإيد قطف فرحة
بقى لى كتير أحاول أطولها ما عرفتش
وما اعرفشى هيفضل حبي أسطورة
نغم متشال فى قلب الريح
بيبدر عمرى من تانى
وتتاخر عيون الناس
يفرغ عمرى على صوتك
يدور قلبى فى ملكوتك
أكون قوتك وياقوتك
فى ننى عينيك تسكنى ما تطردنيش
وتحمينى من الخفافيش
أدوب فى أمانك الواسع ولا اخافشى
لا من بكرة ولا بعده
وأتمنى وتتمنى ما دام عنا
عيون الناس بتتاخر

فبراير (١٩٩٧)

الضفة الثانية

من روحى

لَمَّ الدفا من عيون كل البشر
ويفرحهم ضمير سنين عمرى
واوصل لآخر منتهى جنونك
كسر المسافات
اضحك لآخر نبض فى عروقك
واسرق زماننا المعاند فينا لَمَّ الشوق
خبينا يا الله من عيون الشمس
خلينا نتوحد بجد
حد يبحب الدنيا أم دم خفيف
تتوهج روحنا زى حلم شفيف
تعرف لو عم جاهين ويانا
كان طرح اللولى فى عينه
واترسمت صورة ضحكة
ف كل جوارحه وقال مبروك يا اولاد
يوم عيد الحب

كان غمز الواحد فينا بقصيدتين
كان قال ولا ميت رباعية وموال
وإدأنا الأمل إن احنا نعيش ونطير
عصافير ما تخافش من الصياد
لو صاد الحلم الحالى
بالصبر هانزع غيره
لكنه فارقتنا وراح
وبقينا اتنين خايفين من بكرة
بندارى هوانا
وإن حد سألنا بننكر.. لأ
بنغير فى الموضوع
وارجع يقتلنى الشوق
وباموت من إحساسى بإنك دلوقتى
وف نفس اللحظة
قاعد مستنى ولادة بكرة




بتدور على صورتى بين ضفة بعيدة
وبتحضن صوتى على الضفة الثانية
وانا قاعدة
وبرغم بعادنا اللى مالوش معنى
يلسعنى النفس الخارج منك

نوفمبر ١٩٩٧

تنهيدة

سرح الهوى جوه الغيطان
والقمحة عشقت شوق حنين السنبلة
مع ضحكة العصافير
والشمس مالت حررت
قلب الرحاية م الحجر
بصمة شفايفك علمت كل الملايكة الحب
متبروزة صورتك فى ننى العين
والروح صهيلها عليك ما يخلصش
باحسدنى دايم كل لحظة عليك
حبك حوانى وضمنى
وسيل حنانك علمنى الهديل
فى جزيرة الأشواق ازرعنى أغنية
أبيض يا بكرة جى تتمخطر
اللى ف إيدك دا لوتس والا أمنية
باتنفسك أعياد
أنغام بترقص فوق سحابة نشوتى



يا دنيتى انسينى جوه عنيه
خبينى بين عقله وبين روحه
خلينى وردة ف عروة قلبه مايتدبلش
أبقى له مرسى ووطن
وبداية المنتهى ونهاية البدايات

مارس (١٩٩٧)

دقة قلب

غنى السكات فى عينيه طرح حواديت
فرح الحمام وحط فوق رمشه
ميل وباس غسل البحور عنبر
والضحكة رصت قلتيں مرمر
باشرب وباعطش فى الدقيقة سنين
سكنت ملامحك بين ضلوع شوقى
والحلم داب بيننا ودبل صوته
يشرق علينا نور الغربة ما نعرف فين
راحة روحنا وفرحة يومنا
وعمر بنستناه ما يجيش
انحت طريق مخنوق فى زمان مالهش قلوب
وارسم دموعنا فوق قزاز بيئن
اتلخبطت كل البشاعر واتعشقت
مع دقة القلب اللى رقصت من جديد

إبريل (١٩٩٧)

صوت النور


ازرع سنينك صبر تحصد احتمال
طول ما الألم جواك
مزروع فى شرايينى
طول ما القلم فى إيديك
أتحدى بيك الكون وتحمينى
دا انا ف أحلامى بالمح
دمعتى فى عينك
ساعة مخاض موتى باقول فينك
تفك الليل عشان يجرى
وتساقط نجومه مرطبة حنة
نفرح ونستنى شمس الأمل
تفرد جناحها ع المدى
قلبك محارة مخبيانى ف قلبها
ليه تحرقه

لما الزمن لُصِمَ هوانا ف دمنا
ليه تفرقه
بحبك آه ومش ها انكر
ولو تنكر أقول كداب
باشمّ النور فى صوتك
لما يندهلّى
وباتنفس صدى التنهيدة
حين ما تنن
باحنّ لفرحتى فى عينك
وامنّى ف قلب داب م الهدهدة
يا أحلى قصيدة كتبتها بعمري

ديسمبر (١٩٩٦)

منك وإليك

وطلع الفجر مُتَبَسِّم
هرَبْتُ من الضيا لصدرك
وخبَّيت فيه عذاب العمر مكتوب لك
واتمددت في ضلوعك أناجيك
بقيت أتمنى أقولها لك
أنا ليك
بكيت مَرَى جرى ف دمك
شفاني الحب واتريعت في قلبك
فَقَسْتُ دموعي يمام غنى
لنور الصبح في عيونك
وطال الليل ما بين الحب والمغنى
لقيتني نعتت في جفونك
يا باش سلطان وبحر حنان
ليه انت جنان وانا عاقلة
ونفسي ف مرة أتجنن
وجوه عيونك الدافيين أتحن



واركب لى حصان رهوان
واروح مملكتك العذبة
أبلط فيها واتخبي
أحس دفاى ببرودك
أنا محتاجة لوجودك

(١٩٩٦)

ألبوم

كفين ع البعد يتكلموا
يضحك زمان البوح
نوار حروف العشق بيلالى
خطوط العمر
تتعشق بنظرة عين
وخط حياة ما بيدورّش على بكرة
وبيقرر يعيش اللحظة بس بجد
فى ضمة إيد
بتتطرأسامى المولى باللهفة
تسبّح كل نبضة بخوف
وتتمنى تعيش العمر م الأول
زوايا الروح
بتتحدد ملامحها
وجوه الكادر نيل عطشان
بيتدارى ويسمح دمة م الوحدة
مرار الموج بيصهل
جوه حلق النيل
ما بيخوفش

ولا عمره قدر مرة
يفرق حزنه
ع العشاق فى شطينه
ولا اتمنى يسلسل
فرحة النسمة بأحضانه
ولا يغرق كلام الليل
وضى الهمسة بىصاحب قناديله
ما بين الحلم واللا عقل
بتتجمع خلايا حنين بيقتلها
بلمسة إيد بتتفجر جناين ورد
وتحاسب
إذا ما حد يلمح سرها فى عينيه
وتتعلم
تضفر طرف أشجانه بشرىانها
وتستناه
دا صوته مية المحاية
وأخر صورة تتشكل تقاسيمها
بواقى قلب يتمرد على صاحبه

ويضبط دقته بإيده
ويسرح فوق حدود العقل
مش عارف
لإمتى هاتسكنه التوهة
وانا بامسك
بسّن اللحظة وارسمنى
دقايق عشق
وثانية موت
وساعة صدق
باسرقها
وتسرقنى
بكل رتوش وجع فايت
وتزرعنى
فى آخر صفحة
م الألبوم

ديسمبر (١٩٩٨)

قصائد:
محمد صابر مرسى من ديوانه:
(الحق والإنسان)

الصادر عام ٢٠٠٠
والفائز بالمركز الثالث

إثنين

ولا عاشق إلا وراشق فى السكك... دابر
لابس هدوم الهوى.. مع إنه مش طاير
ثاير.. وفاير.. كما زيد البحار يبقى..
يستبقى إيه جواه طول ما العصب حاير؟

أه يا ضفاير.. بتنزل لما أرض البير
تجدل حبال الأمل.. وتيسر اللي عسير
أنا وانتى إيه؟.. والزمن: قلاب كما الساقية
لو لحظة باقية لنا.. وتضمننا.. ده كثير

كان الأمير.. الصغير.. بالناس ما يدراشى
عدى عليه الهوى.. لكن.. ما وطاشى
فاتح له صدره العريض.. ويعبى ما يخلى
يا للى ابتليت زينا.. غيرنا ما تبقاشى

مازلت ماشى.. شواشى درابا تتعالى
بصيت لشمسى.. قالت لى: اسبقنى وتعالى
عصبت عيني بيمينى.. والشمال: دلى
وآه.. يا خلى.. صبحنا فى الغرام: حالة!!

رحالة؟.. قال الطبيب.. قلنا له: متمكن!
لكن.. بصبر العزيز.. ولا إن نتمسكن!
إيدينا فوق البيبان.. أربع إيدين جمعاً
طوعاً.. يقول: ادخلوا.. والجرح يتسكن

يسكن خصاص الجبل.. الناسك العابد
أما اللى ويا السبل والخلق بيكايد
وانتى إيه غير بشر.. من روح ومن إحساس
والناس - يا بنت البشر - ليه قلبها جامد!!

خامد يا بركان.. لكين جوفك.. بيتلوى
فيك: زمجرة آدم.. وعود كبريته من حوا
ضحكت عليه.. انفجر.. إتمسحت فى إيديه
عيني عليه.. إتعصر.. طب ما السبب هو!

جوه الخلايق.. شقايق.. من قابيل وهابيل
والخيل ما تاكل ولادها.. رغم إنها خيل
بقى ده كلام - والنبي - يا أيها الإنسان
جبان - وشوف جواك - وتقول: مالکش مثيل!

أشيل هموم البشر.. وأنا همى مين شاله
وحبيبي لما اقتصر.. مين اللى وشى له
مش كان يقول الزمن للقلب.. يتأنى..
واستنى إيه - غير شجن - م اللى سحب شاله!

الزمن

حواديت.. حكم.. أمثلة..
متشكلة: توابيت..
يتلم فيها التقى..
جنب الشقى.. العفريت!
لانا كم حاوى..
ولا غاوى أقول الغاز
يمكن إزاز كلمتى.. يجرح..
.. .. لكن مهماز!

لسباني.. يا حصاني
بسيط.. قوى - أنى
.. .. معجون من الحواديت
كان.. لما كان الزمان..
أبيض.. بياض الخير..
قال الأمير للمنجم: حلمت..
قال له: خير..
قال له: لقيتني ف بير..

فقير.. .. بلا درهم!!
شال المنجم عينيه للنجم.. بيهمهم:
دبرنى يا دى النجم..
الوزن.. والا.. الحجم؟
قال له: نواية.. و... .. زير!!

.. .. الفرق بين السما والأرض..
حرف «الواو»!!
مش ناس تعيش على ريش..
وناس.. مافيش بتاو!!
الأصل: آدم..
وآدم.. من حما مسنون
لما استوى.. .. استوى
وان قال له: كن.. بكون

يا ماشى فوق الردى
طالع لفين؟.. للمدى؟
بكرة.. الجميع.. يتساو!!

قال «دبشليم» الملك: اللى سلك.. سالك
وإذا كان أبوى سلطان.. يبقى أخوى.. ذلك
والهالك اللى انضرب.. لما انطلب للموت..
على إيه يبيغى الهرب من ضربة النبوت؟
قال «بيدبا»: مولاي.. ..
الدنيا: رايح جاي..
.. والملك.. للمالك !

كان.. «بيدبا».. فيلسوف..
معروف.. بأقوى لسان
وعشان رحيم.. وعطوف..
مش خوف.. لكن فنان..
خلى الغابات.. حكايات
.. ويمنطق الغابة
رسمها ع الطرقات:
غلابة.. و.. ديابة
وقضيته.. جواه..
فى القلب.. والا رواه..
يبقى الزمان: إنسان!!

ياريت.. يا حرف النداء..
اللى تناديه.. يحسم!
«على بابا» اللى ابتدا
بافتح.. «يا سمسم»
«مرجانة».. حتكون معانا..
والا بايعانا؟
حنضيع فى قلب المغارة..
والا شاريانا؟
يا طالع الشجرة..
إحكى بما يجرى..
قال: البعيد.. معتم!!

وليد.. وقابض إيديه..
على إيه؟
ما يفهمشى!!
ما صادفش إلا الأسى..
لما نسى يمشى..
لم هز جزعك يا نخلة..
وانتظر وعدك!

أو عز شمعك يا نحلة..
وارتجى شهدك!!
ولا قاس خطا غيره
يبقى - أكيد - طيره..
من بعده.. ما يحومشى!!

النعمة من رينا: لقمة وحصوة ملح
والكنز - لو شدنا - ما يكونشى جمع وطرح
لكنه يبقى الرضا..
زى الفضا للطير..
لو صير.. حيصبح عسل..
واللى يسير: بيصير..
إسعى.. حيسعى معاك..
سبحانه من أنشاك..
بين الألم... والفرح!

موال «حسن» ما انتهاش
بل عاش.. وبيكمل
وان صوت «نعيمة» انحاش..

معناه... بتأمل!
يا صبر «أيوب»..
يا المكتوب على «ناعسة»
صابرة الجديدة.. فريدة..
بس مش ناقصة!

ويلها: ويلين.. يا طبيب
هل.. جرحها حيطيبي..
والا.. حتتحمل!

حبيبتى.. فينك؟
جبينك: ضى وسط الليل
الألف ميل.. قستها
وهرستها مواويل!
أزميل بينحت طريقي..
لما صار كفى..
لاجل يطولك.. بطولك..
عمره ما يكفى..
بضوافره.. هد جبال

واذا كنتى.. إنتى.. محال
إيش حال.. جبل مع سيل!!

«عنتر».. بيطوى الفلا..
ولا يوم سلا «عبله»
وعشان عيون المها
جهز لها.. نبله..
السهم صابه..
وسابه.. دمه متبعتر
ومين يلمه..
وامه.. ولدته أسمر!!
ما اتلم غير شعره..
ويساوى كام سعره..
.. لو «عبله».. مش قابله١٩١٩!

لو كان حبيبك عسل..
ده إنفعال وقتى!!
يأتى فى لحظة صفا..
أولما بتشتى..

أعرف جدع مسكين..
صار له سنين.. صابر
سأله السبيل: على فين؟
قال للسبيل: عابر
ميل عليه يسقيه
لح الدموع في عينيه..
قال: بخته من بختي!!

فيه ناس بتدي كده!
مش بغددة.. أو.. من!
وناس بتاخذ.. سدي
ومودودة.. .. بالظن
وناس بتطرح عطا..
وان كان غطا في الصيف!
وناس.. بتجمع.. ما ترجع..
... غير بحد السيف..
يا طير.. أيا مسافر
طول ما الجناح وافر..
تلقى الهوا - لك - حن!!

«أبوزيد»... .. غمز..
والكحيلة..
الكحيلة..
صبحت ريح!!
وان كنت - متلى - هلالى..
إبقى لى.. عربى.. فصيح
لما شربها عرق.. مشرقها.. مغربها..
وحين «بوزيد» انحرق.. إوزنها واعربها..
هل.. الكحيلة = أساس؟
والا.. عمامة راس؟
والا الهوى.. .. تباريح!!

«لىلى»... .. فضل يناديه..
يناجيه فى حروبرد..
بين الدروب.. يا «قيس»
بتدوب.. وتنفخ: شرد
عدد الحصى.. أشعار..
بالتار.. لم يدري!
شارى شرا المجنون..

مفتون.. ولم ييرا !!
يا ويل - يا صحرا - نداءه ..
ما سمعه إلا صداه..
واللى أخذها: «ورد»!؟!
ساهر.. يا نجم السما..
.. على مجلس السمار
وكل سامر.. كما..
حلقات م الأسرار
كان «شهير» الملك..
قدامه أغلى كتاب
الألف باب.. .. سدهم
ما فضلهوش. غير باب!
يا موج.. ومين يهديه؟
قال: لولا بحر التيه..
كان.. قصر المشوار!!

«لقمان»... .. حكيم الزمان..
قال للزمن: .. يكفيك!
ضربت بيك المثل..

.. ضريتنى بكفيك!!
فرشت ارضك حكم..
شيلتنى احمال
م اللى اتحكمم .. او حكم
م الماشى .. م الخيال!!
.. لبستنى طوقك
وبعتنى بسوقك
اعتقنى .. مش حاوفيك..

السقا ... بعد الخبر..
قالوا لابنه .. مات!!
ولا عرفوا ليه انتحر..
بل سرسبوه روايات!!
عطشان فى سوق المية..
قال: يا خلق .. يا هوه
فتحوا المحابس .. نزل دمه..
ولا لموه..
والقرية .. يا ولداه..
ما غرقتشى سواه..

وَرَا كُلَّ بَابٍ.. مَرَّاتٍ!!
عَطَّارٌ.. مِضْفَرٌ شَوَارِبُهُ..
... يَرِيوُ عَلَى السَّبْعِينَ
مِنْ تَذَكُّرَةِ لِدَاوُود..
خَدَّ عَيْنٍ.. لَكَيْنٍ.. سَابَ عَيْنٍ!
وَلَا وَصَفَتْهُ.. نَفَعَتْهُ.. حِينَ لَمَّا دَاقَ الدَّاءُ
كَنَسَ عِطَارَتَهُ.. بِحَيْرَتِهِ.. مَا التَّقَاشُ تَرِيَاقُ
أَرْزَاقِ لِنَاسٍ مِنْ نَاسٍ
قَامَ قَافِلُ الْكُرَّاسِ..
وَاتَهَدَّلُوا السَّبْعِينَ!!

قَالُوا: الدَّمُوعُ.. عُمَرُهَا.. أَبْدَاءُ..
... تَدَاوَى جِرْوُحُ!!
فِي الرُّوحِ.. صَرَخَ عَصْفُورٌ..
... عَلَّشَانِ كَدَهُ.. مَا أَبُوحُ!!
وَاعْرِزْ فِي قَلْبِي يَا شُوكَ..
شُوكَهُ..
وَرَا..
شُوكَهُ..



سَمِعُوهُ... فَقَالُوا: نَعَمْ..
مِنْ طَبَقَةِ الدُّوْكَاهِ
زَعَقَ.. وَقَالَ: دِي آاااا هـ
رَدُّوا عَلَيْهِ: اَللَّهُ!۱
طَقَّ الْعَلِيلُ.. مَدْبُوح!۱

إبداع

المُبْتَدَأُ

وَقَتِ مَا كَانَ الْفَتَى عِرْقَانِ فِي جَلَابِيتِهِ
رَاضِي بِحُكْمِ الزَّمَنِ .. لَوْحَشَ حَشَا غِيْطِهِ
وَلَمَّا لَمُوا عَلَيْهِ الْخَلْقَ: غَنَى لَنَا ..
شَهَقَ!! عَشَانِ يَضْحَكُوا ..
رَغَمَ بَكَى صَوْتُهُ!!

يا ليل.. يا واحد فى وشك كل أحلامنا
يا عين.. لمين تنظري.. رضوان بلا جنة
يا شوق.. لكنك شوك مزروع على قدأمننا
يا آه.. يا شق الضلوع.. يا تبت أحلامنا
يا صبر.. مرر كمان.. ارتاح فى ترحالنا
يا ناس.. يا كل البشر..
ضاق الحجرع الدود
واللى صبح موجود
لا عود.. ولا رنة!!
يا ليل يا و ١١١ اخذ فى وشك..

واحد: شُوف.. شُوف - يا اخويا - الجدع!!

مَالْنَا.. ومال بلاوييه؟

قُلْنَا له: غنى..

ف.. كان - لو عنده م الأحمر -

يكبّر.. عشان الناس..

مش جاي لَنَا نواسيه!!

❖ يا عين.. لمن تنظري.. رَضُوا ان بلا جنة

يا شوق..

واحد تانى: بِحُكْم تجربتى فى علم النفس..

هذا الشخص: سَوْدَاوى

من مُنْطَلَق لا وَعَى غير مَحْدُود..

لكين موجود.. يا سبعاوى..

إن اللاوعى.. يحب السعى فى الأسواق

أشياء.. يُطَوِّل شَرَحَهَا..

بكلام.. ومِتْسَاوى!!

❖ يا آآآآ هـ... يا شَق الضُّلوع..

يا نَبَت أحلامنا..

يا صَبْر.. مرَّر كمان.. وإن..

واحد تالت : طَبَّ حيث بتوصل أصواتي..

.. اقْطَعْ دراعى من باطى..

إن اللى واقف - ده - نَكْرَة!

ومش حبيجى عليه بُكْرَه!

فَدَانُه إيه جنب قيراطى!؟

❖ ياناس.. يا كُل البَشَر..

دق الحجرع الدُّود..

واللى.. ..

واحد «كِدَه»! أنا.. عندى رأى.. وأنا.. مثَقَف..!!

آهى تجرية.. ونسيبُه يقول..

أكيد.. حَيْسَكُت.. لَوْ سَاعَة

... .. رَاح يَنْداعى

فيه.. ناس.. كتير.. كَدَه.. يا جماعة

ويبقى.. فى الآخر.. بَهلول!!

... ..

❖ مين لسه ما قالش رأييه؟

مين لسه ما افتاش!!

مازال.. مازال الفتى..

واقف.. بصوت منحاش..

والسوق - كما السوق - متكوم على كتافه

يهرب من الخناق.. أم يجرى لكتافه؟!

وانتو.. يا صفو البشر..

داريين بما ينقال..؟

فى لحظة.. تحت النعال..

ما دريش بمين شافه!!

الخبر - من غير ما يرمى ملام..

برعشة الإيد.. فوق الطين.. بخط الإيد

كتب.. بدمه السخى.. قبل ما تمشوا بعيد:

إزاي.. و.. ليه.. و.. حرام!!!

قابليت رمضان

قابليت رمضان.. في الميدان

بالنقرزان: بنت وصبي

إتفتحت كل البيبان

واتلم شامى ومغربى

إذ هل.. بل التمرتين..

والكل.. صلى الركعتين

اتشبكت.. إيدين. إيدين

قلنا: مدد.. قال: يا نبى!!

قابليته في «سوق اللمون»

غصن الزيتون قال.. مطلبى

تجرى على «مجرى العيون»

وتكون معايا ف مركبى

بشاله شال زوادي شيل

عوّد ومال يم السبيل

وجاد بقرفة وجنزويل

قلنا: مدد.. قال: يا نبي!!
فتح لي باب اسمه «الفتوح»
قنت لصبية: قري..
على «باب زويلة» كيف أروح
هناك.. قرايبي وملعبي

رمت الضفايرع الشموس
ضحكتها نورّت الفانوس
مديت لي سطل العرقسوس..
قلنا: مدد يا اهل النبي!!

شاورت لي على «باب الوزير»
وانا كنت واصل من «بولاق»
فتح... وقال لي: يا أمير..
«وراق» في غاية الاشتياق

لولا حويت.. ما حكيت عنى!
وقريت كتب صفرا وبنى!
أنت الذى يوم ما تغنى
أفرح بقريك كيف أشاء

عديت.. وقلت: يا أهلى سماح
كلامنا بلدى وع الدواق
أنا وجهتى «سوق السلاح»
ومعادنا ع القهوة مساء

طلع على التخت وحضنه
والبخت طالع على بدنه
سلم على الطالع مدنه..
هز الهلال.. لو عز دواء!!

قابلته على بابك يا «خلق»
والخلق: موج بيقول: آمين!!
بوصلة إيديه شاورت لشرق..
شى الله يا «زين العابدين»..

والمشى.. بيقول للرصيف:
الضيف فى أيامك مضيف
لو فول.. ينبت ع الرغيف..
واللقمة بتبوس الإيدى..

يا «مغريلين» أحلى الكلام
يا «صدفجية» و«عقادين»
سيدى «الإمام» باعت سلام..
«اللفحامين» و.. «النحاسين»


يا إيدى.. يا صقفة طيبة
الشمس رايحه مغربة
بتقول: يا ناعمة غريبة
للذاكرين.. والعاشقين

خدنى وطلعنا على «القلعة»
ضحكت وقالت: والله زمان
مانستشى يا بهى الطلعه
ولكل وقت أدان وأوان

قال «الرفاعي»: أجهز قصر!؟
والا انتو قاصدين «باب النصر»؟
رد «الجيوشي»: كلها مصر..
م «المرج» لما تروح «حلوان»

رسّاني.. بعد بحور ويحور
على شط نور.. من زعفران
وداني.. أستاذن وأزور
«أم الكرم».. ست الديوان

إيدك في إيدي يا عم صيام
على شق تمر وعنب الشام
والصوت يا «رفعت» هدل حمام
للم قلوبنا على القرآن
قابله.. في حي «الحسين»
والعطر.. عنبر أشهبى
قدامه: شاي أخضر.. مع تين
صليت.. وصليت ع النبي



داير معاه من باب لباب
يا اقدامى.. دوى واتعبى
طول ما اليمين شايلى الكتاب
القلب: متعافى وصبى
قلنا: مدد
قال: يا نبى

القصيدة الفائرة
بالمركز الأول

القسل

خالد محمود

الغسل

الريح..
بتعبي شراذك بالأحزان
والبحر..
بينحر آخر شط ف روحك
والهم بينحت فى ملامحك
ويوشم تجاعيدك باليتم
ومراكب شايلة جروحك
بتطوف..
على كل قبور الكون
مش لاقية مكان
وكأنى..
فى أول ليلة فطام
مخنوق متوتر..
تايه وباحن لريحة عرقك
لما تداعب شعرى
أطمئن..
أدفس وشى ف صدرك

وأغنى..

عيل إنسان

.....

مهزوم

واقف على غسلك

وايديكى بتمد

تناولنى منابك

من تحت الطبلية

من غير ما يحسك أبويا

الليلة الوقفة

وأنا وانتى..

فى طابور الجمعية

وكيلو اللحمة بـ ٦٨ قرش

كان لازم يا امه..

توصينى على دى الوقفة

وكانك قاصدة لآخر مرة

بنفس الفطرة

تدينى الدرس
ما بين الصدق
وبين الغش
إزاي يا امه تخلينى
أشوفك عريانة!
وايدين النسوان
بتشيل وتحط ف لحملك
وأنا وحدى طابور
والفرجة بلاش..
وحانوتى الحتة الغشاش
بيفاصل على غسلك
والميه بتنزل على جسمك
بتعزى الدمع المتحاش
.....

حاسبوا يا ستات
بشويش..
بشويش ع البطن
اللى شالتنى..
والصدراللى إدانى القوت

والكف اللى غسَل لى الهدمه
وعنيكى الباردة توصينى
خليك راجل..
راجل!
طظ... طظ
دا انا باحسد كل بناتك
على لطم خدودهم
وصواتهم..
وعديدهم
دا انا باحقده المناديل
المليانه دموع كدابة
وعلى آخر ستره
بتستر بدنك
كفنك..
بيطلع لى لسانه
إكمنه المسموح له يضمك
وخيطاناه هتتحنى بدمك
وهيشهد وقت سؤالك
ويدوب فى ترابك

.. .. .
حلينى يا امه م الوصية
وادينى فرصة للبكا
زى العيال اليتامى
زى السما ..
لما بتودع الليل بالتندا
سايبالى صرة دعا؟
ولا الملايكة شاغلتك
بالجنة فنسيتى ..!
هيطول غيابك
واللقا مجهول
ياموت ياغول
خدنى معاها
والنبي

القصيدة الفائزة
بالمركز الثاني

التامنة

منى هيبه

التامنة

التامنة وانا لسه اهو
زى ما انا
قدام عيونك بانحنى
لو طيف حنانك مسنى
لؤلؤ كلامك ينفرط
فى العتمة ضى
يتشعبط البعض اللى باقى
جوه منى ع الحروف
يلضم فى لبلاية حنانك
حلمه.. رغم المستحيل
وغصب عنى من فوق كتافى
يندلق حزن السنين على طرف توبك
ينفرط عقد المطر من بين عيونى
يفرقك بالأسئلة

الأغاني ما بيننا ليه
ما بقيتش أبدا ممكنة؟
وليه ف قادوس الذكريات
مشلول جموح الأزمنة؟
وكأنه بالدهشة أتصلب
ساعة صهيلك بالوداع
على قلب متعثر بخوفه والألم
حاضن وتاد الأمنيات
ومعشق الروح فى الخطاوى
لاجل يتشرح حنينهم للسفر
لكنه كان قلبك حجر
ساعة السفر
قدرت تقطع ع الكلام
كل السكك

قدرت تقفل ع الحكاوى والغناوى واللقا

وتفتح السكك اللى واصلة للبعيد

إنسان أكيد

ساعة الضراق..

فرطت روحى ف كفك إيدك خدتها

سبت لى الشوق اللى لابد فيك

فى قلبى وقتها

من وقتها

وأنا قلبى فارش بالأمانى المزمنة

من كام سنة

من كام سنة

دى التامنة

القصيدة الغائرة
بالمركز الثالث

حكاية شندويل

مأمون كامل

حكاية شندويل

نسمع حكاية جدع فلاح عشق أرضه
أرضه كمان عشقته حافظت على عرضه
والعشق بينهم يا ليل على عين مخليهم
الأتنين تشوفهم تقول واحد عشق نفسه
هى دى قصة حكاية «شندويل»
شندويل ده أصله واحد
من ولاد آدم بيشقى
والغريبة
الشقا كان باختياريه
فوق ما إنه ظروفه صعبة عشان يعيش
بتقولوا يتعب
هو ما استكفاش بحمله
هو ما استكفاش بداره

من نهاره

والعطر فنه وكاره

دا العطا عنده حياء

دا العطا عنده صلاة

من نهاره هو مخلوق لجل يدى

حتى لو كان بالعطا هيزيد شقاء

والشقا كان باختياره

والعطا فنه وكاره

❖ ❖ ❖ ❖

اسم الأصيل شندويل

بيته بساط أخضر

عنوانه بين البيوت عايق بيتمخطر

وحكايته بين الحكاوى

عمدة الحكايات

تسمعها تعرف صحيح مين اللى يتقدر

شندويل.. اسم معروف من زمان

اتولد ويا الزمان

فى المكان.. نفس المكان

بص من حواليه لقي نفسه لوحده

بص من حواليه لقي أرضه وفاسه

قال مافيش إلا الشقا زاد للطريق

مش عشانه

شندويل بيحب غيره

شندويل يدى لجيرانه

والجيران.. جار يدى جار

والبداية شندويل

اللى كان قادر يعيش من غير شقا

والشقا كان باختياره

والعطا فنه وكاره

والناس معادن يا عين ولكل معدن ناس

مين اللى قال الصفيح يلمع ويصبح ماس

مين اللى قال الذهب لو فى التراب يرخص

مين اللى قال الأصيل هيجى له يوم ينداس

❖ ❖ ❖ ❖

شندويل ده معدنه وتركيبته تبهر

معدنه فى الليل بيلمع

عمر ما الضلمة تطول تاه فيها نوره

فى النهار باين ملعلع

شمس يدى النور ولو جواه مولع

اللى يفقع

إن فيه ناس قال بتطمع

قال حتاخذ يوم مكانه

قال حتلقى شندويل

شندويل الدار أساسها يشيل جبال

شندويل الأرض خيرها يوم مازال

شندويل الإيد بتتحدى المحال

شندويل النفس تصبر صبر جوه

شندويل تسأل

تلاقى الأصل هو

شندويل الود نبض ف قلبه جوه

شندويل الثورة بعد سكوت تدمر

الى حتى ف يوم يفكر

إنه يخدش يوم جداره

والشقا كان باختياره

والعطا فنه وكاره

❖ ❖ ❖ ❖

ييجى الزمان ويروح

وأدى شندويل هواه

الشورة شورته وصوته جاى من جواه

فيه اللى يمشى يمين

واللى شمال يمشى

وهو رجله تروح مطرح ما يرسى هواه

شندويل الأصل ثابت

والرياح حواليه تصفر

يوم تهدى.. يوم تعفر

يوم تجيب زاد للسفينة

يوم تجى له قال ترجع شندويل

والأصل ثابت والرياح

عمرها ما هى واخده منه

عمرها ما هى جايبه ليه

غير بكيفه واللى عايزه

والسؤال !!؟

إيه اللى عايزه

دا الشقا كان باختياره

والعطا فنه وكاره

❖ ❖ ❖ ❖

أرضي يا رحلة حياة

بدايتها كان طينك

آخرها فيكي أندفن

واصبح أنا طينك

ندّر على يا غالية

بعد الحساب لارجع

أرويكي تاني عرق

واسمع مواويلك

شندويل دا أن كنتوا عايزين تعرفوه

شوفوا أرضه هتشفوه

هو هي

هي هو

شاب أسمر لونه من لونها ببيرق
خاصة لما عرق جبينه
ضى شمس قمرها صافى
هو هى
هى هو
طوله فارغ طول شجرها
يملا عينك لو بتعشق
قلبه أبيض قلبها دائما بقدرة ربه ينطق
سره غامض سرها
ياما رب الكون بيخلق
صبره يحكى صبرها
ع الحبة تهديها الطريق
هو هى
هى هو
لو ضحك تضحك خضار

لو يقول تنطق عمار

لو غضب تطرح دمار

لو شقى تفرح وتزعق فى الديار

قوموا شوفوا شندويل

ابنى

لا همه حريوم ولا برد ليل

يضرب الفاس تحت رجله

تخلى عرقه حب بيشاور عليه

حب بيخلى شقاء موال يخلى نفسه تشتاق للشقا

والشقا كان باختياره

والعطا فنه وكاره

❖ ❖ ❖ ❖

أرضى يا عود الريحان بروايحه فواحة

أرضى يا قوت الزمان زراعة طراحة

ولاده زين الرجال يسقى الشقا مواويل

ومهما يتعب يقول بعد التعب راحة
فى عز شمس الصيف فى عز ليل الشتا
شندويل بيقول يا ليل
فى عز شمس الصيف فى عز ليل الشتا
لما تلاغيه أرضه
بيروح لها بقلبه
مايهמוש تعب
يركب على مسعود
ويهزه هزة عود
والساقية تصبح ناى
يحدى على الطنبور
والليه جوه الشقوق يسمعها بتزغرد
والعود صلاة النبى زى الشجر ممدود
والعين بتتحدى مهما تشوف الدود
تنده أبو قردان

والأيد تحط الشتايل والبذور إيمان
والكل لحظة رضا رغم الشقا تخليك
لو يوم تحس الهنا كل المنى تعيشها
شوف قد إيه الشقا فى شندويل ألحان
شوف قد إيه الشقا عنده غنا وموال



عاشق وعشقى ما بين الفاس وحصاوية
الفاس تلط الحصى أسمعها غنواية
زغرودة جوه القلوب تطرح بشاير خير
يقرب لعينى الأمل ضلة وفلاية
وبيقولوا خلاص صورته
بقت تايهة عن اولاده
تقولشى اولاده موش منه
وقال طالع له لغة جديدة
تقول للخلق فين هو

شوف البلوة
كانه ما كان
ولا كانت فى يوم فاسه تجيب الخير لأهل الخير
وتضحت للغريب قبره
وله يختار
يا أما يدوب ويلبس توب ما هوش توبه
يا اما يموت ويطويه التراب تحته
مش يغير شندويل
هوه معقول شنوديل يوم ينسى نفسه
طب ده لو يوم ينسى نفسه
أرضه تصرخ فيه تقول له:
لا يا إبنى انت نبضى حته منى
انت وحدك بس تعرف إيه ناقصنى
انت عهدى أفضل أدى
وانت تتعلم وتدى

أنت ترويني بشقاك
شندويل يا جدر ثابت
عود بيضحك ع الهوى
ما يهمناش لو يوم يهزك أو عاندنى
اوعى ييجى اليوم تسيبنى
دانت لو يوم تنسى نفسك
راح تلاقى حتى حصوى
تحت رجلك نار بتفنى خطوتك ويا الغريب
يا اللى غرامك أنا وغرامى هو انتى
يا اللى القدر قال لنا نشقى أنا وانتى
نتعب ما نطلب ثواب إلا من الخلاق
سبحانه خلا الشقا لى ولىك ترياق
يا جنة دنيا ودين والحلم هو انتى
❖ ❖ ❖ ❖
شندويل يضرب بعينه يلقي أرضه حاضنة رجله

زى ما بتحضن نباتها حضن يدى له الحياة
شندويل يشتد عوده باللى ساندته ويهواه
أصل أرضه هى حبه
موش عشان ما هى قوته
موش عشان ما هى زاد أم العيال
موش عشان ما هى لقمة لكل عيل لأدا أكثر
حبه ليها أعم واشمل
عاش معاها العمر كله من نهار ما صار وكان
رحلة الليل والنهار كتفها ف كتفه حنان
عز عرقه يديهولها يحصده ضل وأمان
يقسم الفرحة معاها تكرمه تديه نصيبها
فى الشدايد شادة ضهره
همها تحافظ عليه
تحرسه من ذل غيرها
دا الشقا كان باختياره



قال الأصيل شندويل واسمع كلام قاله
مهما الليالى تطول الشمس طالعة له
تفضح عيونها النهار اللى غريب عنه
ونورها يحرم على اللى الضلمه رأس ماله
شندويل يقول كده دوغرى صريح القول
مافيش داعى عشان نغمز ولا نهمس
مافيش لا لف ولا دوران
وطول عمرى وأنا عايش زمانى بليله ونهاره
دى رحلة عمرى دواره سواقىها هناك سبعة
هنا طالعة على شمس نواره
لا يوم غابت ولا مرة تلين لجبان
وطول عمرى وأنا عايش زمانى بليله ونهاره
يجينى الليل يلاقينى ما فيش ضلمة
أنا نورى فى جواى مورينى
يجينى الليل يلاقينى ما فيش سقعة

أنا نبضى ومن قلبى مدفينى
يجينى الليل يلاقينى مافيش غربة
أنا عارف طريقى ورسمه أنا بايدى
يجينى الليل يلاقينى ما فيش توهان
وطول عمرى وأنا عايش زمانى بليله ونهاره
يجينى النور يزيد نورى
ما دام الأصل من عندى
وطول عمرى وأنا عايش على عندى
على عنفى أهم واسير
على عنفى أسيبه يطير
ويدخل دايرة النسيان
بعيد عنى
أنا مصرى.. ودى أرضى
وأيام الزمان عمرى
وفاكرينى فى يوم راح أتوه

♦ ♦ ♦ ♦

القصيدة الفائزة
بالمركز الرابع

«يا.. كل أحرار البشر»

سيد القطان

«يا.. كل أحرار البشر»

منظر فظيع.. يوماتي ببشاهده الجميع
خلا القمر ينزف دموع
ويطول شتانا وتنطفئ.. شمس الربيع
جنازات ورا.. جنازات
وناس ماشيين وراها.. بيهتفوا
والدم ساييل.. شلالات.. ولا حد عارف يوقفه
ضل الأمان.. فى الضلمة تاه
والظلم بين الخلق شاع
والحق طير.. مقصوص جناحه
زى طفل يتيم وضاع
هدوا البيوت.. بالدبابات
والمسجد الأقصى بنعالهم.. دنسوه
ومحمد الطفل الفلسطينى.. البرىء.. لم يرحموه
وهو مرعوب م الفرع.. ويحتمى بأحضان أبوه

دى لوقت مين.. يقدر يعيد البسمة.. للقلب الحزين؟
مين يحمى أطفال الحجارة.. من رصاص المعتدين
دا الصبر طال
والعدل ضاع.. وميزانه مال
والهم.. فوق الإحتمال
يا.. كل أحرار البشر
من كل جنس.. وكل دين
اللى بيحصل.. ليل نهار
قدام عينيكم.. يرضى مين؟
واللى مش قادر افهمه
كيف ان أولاد البلد.. يتغربوا.. عن أرضهم؟
وبأى منطق نعقله
يحتلها.. مستوطنين أشرار.. وأغراب عنهم؟
ويبقى أصحاب الديار.. متشردين!

وف أرض غيرهم.. لاجئين!
ومن بلدهم.. محرومين!
دا الكيل طفح
وصوتنا.. فى حلوقنا اندبح
بس السؤال اللى شاغلنى.. من سنين
العدل ليه.. سيفه اتكسر؟
والظلم شاع.. بين البشر
والحق.. أصبح طفل مجهول النسب!
ومالوش وجود
غير فى المحافل.. والخطب؟

القصيدة الفائرة
بالمرکز الخامس

السقامات

منى هيبة

السقامات

اكفى فوق همك ماجور
واطلقى حزنك ف صدرى
لجل يرحل للأبد
يا أمايا لسا الكمد
لسه الساعات المضنية
فارده ما بين قلبك وبينى..
ميت سؤال
تفاصيل كتيرة منتورة جوى الأوض
فرحتك.. وأنا لسه باحبى واستها ف الحاجات
قلقك ع الطقاطيق والفازات
لعبنا ف الانتريه ف السفرة
شعبطى فوق ضهر الكنب
سجادة كحتها التعب
حبل الغسيل والمنشفة والمريلة

فاكرة كوياية الدين
ما بحبوهوش
لجلن ما تكبر تبقى راجل زى بابا
خلاص كبرت
وخلص كبرت.. وابتديت اعرف وافسر
يعنى ايه شكل الوطن
يعنى ايه حلم الغلاية
يعنى ايه الحولة والعولة
ومجلس الأمن وشريعة الديابة
يعنى ايه شكل البنادق والرصاص
ووجع بيزعق ف الوجع
يعنى ايه طعم الشهادة
بزيادة يا أمايا بزيادة

متحضنیش ف قمیصی الأبيض

مش كده

سیبی الهدوم ع الشماعات

یا أمایا ملعونة الحاجات

متهلفطیش بالأسئلة

وأن حد قالک مات شهید

ابقی قولیلہ السقا مات

القصيدة الفائزة
بالمركز السادس

وصلة شجن

ميرفت على عمر

وصلة شجن

ولد عجوز
على جبينه عزف الزمن
وصلة شجن
قاطع تذاكر لبكا
راحل فى قطر المنتهى
شايل شروده للسفر
عاصب غناه
فارد همومه مطرقه
مد الطريق قدام عينيه
أنهار شقا
على بعد خطوة م اليمين
سجان لحلمه ومشنقة
وف آخر يافطة ع الشمال
وردة وفاه متزوقة
وهناك على مدد البصر
لمح الوليد اللى انتحر

ميتم جنازته بيتنصب
وكروت نهايته بتنكتب
نقرَ بإيده ع الهرب
لقى البيبان
مفتوحة جوه التهلكة
الليل بيعصر هدمته
تطفى الوداد
غاب القمر
والأرض غطاها السواد
قام العجوز من غفلته
قال العجب
حاولت افلسف دمعتي
حتى الدموع
رفضت غناى اللى انتحب

القصيدة الفائزة
بالمركز السابع

توابيت

أشرف عبد المنعم

توابيت

فى عيونك شايف توابيت
بتغنى نشيد الصمت
وضلوعك شايعة الحواديت
ويتخفق فى عروقى النبض
فى عيونك ما باشوفش الشمس
ليه ما افهمش
لساها سحابة وحتعدى
والا اهى خايقة وحاضنة الليل
والا بتسمع فى الحواديت
والا دى نامية فى التوابيت
والا الأرض اللى بتتمخطر
زى خطاوى طفل معدى
جوه دروب الخرّس

ماشى وحيد
ماشى ودمعه مالى عينيه
كل همومه...
إنه ينشف دمع القدس
إنه يللم دمع الليل
ويكفن كل التوابيت

القصيدة الفائرة
بالمركز الثامن

الغربة تجربة

خالد عبد العزيز

الغربة تربة

الفصل الأول

قاعد وحيد مستنى مين؟
مستنى قطر الغلبانين!!
خُذْلك بريمو بلاش ترسو!!
يمكن يحسّوا.. مرة بسعادة
قطر الغلابة.. دا برضه عادة
والله يا افندى دا مش بيدى
إن كان على....
انا عايز اخطى الريح واعدى
لكن ظروف اليوم عسيرة!!
يرضوشى ياخدونى بحصيرة؟
والغربة تُحكّم.. والحُكْم قاسى..
والجيب مصدى...

والهم شايله.. كتل فى راسى..
واليوم يعدى...
والسكة واحدة.. والقطر واحد
والفرق هو كراسى جلد بسعر جاحد
قوم عيالك.. اربط حيالك
مد الخطاوى.. القطر جالك
القطر جاي.. زاحم يا عم
شيل سياتك.. ماتعولش هم
قطر الغلابة واخدين عليه
واخدين عليه؟
والواد عطية دا ذنبه إيه؟
دلوقتى يتعد ويلاقى مطرح

والقطر يمشى.. يوصل ويفرح
والله زمان يا مصر بلدى
سبناكى حرة.. رايعين لبلدى
جناكى نشقى مقصدنا غيرك
تعيشى لينا ونعيش فى خيرك
ما خلاص مشينا.. سايبينها بترابها
لديارنا ولينا.. داقين على ابوابها
والجيزة سيينا.. وسويف وراها
ودموعنا ولت.. والليل خفاها
والخوف فى عينك يا عم طه!!
خايف عيالك يباتوا جوع من غير عشاها
سكّمها للى باريتها.. واللى شافيتها
واللى بقدرته سواها
القطر ماشى.. بأعلى سرعة فى الظلام
ساعتين تعدى.. والصوت يهدى والكل نام
الواد عطية يصحى وفجأة يقول كلام

أبونا .. أبونا سامع يا أبونا!!
سامع صويت الناس .. بيضوى كالمطاحونة
سامع صراخ .. ونواح كتير عايزة معونة
شامم يا أبونا .. دخان كتير داخل علينا
نزلت يا أبائى نزلت دموعنا من عيننا
صوت من بعيد بينادى وهو ماسك فى الشناكل
فين اللى كان .. ماشى بعساكر؟
فين اللى كان .. ماسك تذاكر؟
فين اللى كان مستنى يقبض
م اللى ناسى واللى فاكرو؟
ويرد طه .. ع اللى كان بيصحن فيه
مزعوج عليه .. وصوت الخوف مالوش شبيه
اجرى يا ولدى ..
اهرب يا ولدى دا الولعة حامية
خايف يا أبويا .. خايف يا أبويا
نموت فى ثانية ...

خايف يا خدنى الموت فى ريحه
واخوى لسة صغار
مايعرف فين ضريحه..؟
كان نفسى يا ابا.. بكره تكبر!!
وادخل يا ابويا.. تعليم فى ازهر
كان نفسى نبقى فى مرة راجل
ونطلع من القدس التنايل
جسمى ضعيف.. يَحْمَلْشِ يا ابا
النار داهى..
دخان كتير.. سد الببيان
خش ف عنيه
عمرى ما شفت..
الخوف فى عين الناس على
الناس بتجرى..
وفى النهاية.. تموت ضحية
وامى الحزينة.. ع العتب مستنيانى

ضاعت أمانى.. إني أعود لآخواتى تانى
والطرحة ياما
اللى وصية فى ننى عيني
الطرحة ياما!!
خلاص كلتها النار ودينى
مستنى دعوة منك تسامحينى
سامحينى يا امه.. ما اعرفش هارجع
والا دى آخرة سنينى
كان نفسى يا ابا أعود لبيتنا!!
وقول لى تعالى..
ضمينى يا امه ولدك فى غربة
من الزمان.. عمال يلالى
دى الغربة تربة...
والناس كتير عايشين بدالى
وفضلت ادارى
أحلامى يا ابا خلاص.. لغيتها من خيالى

حلمى الوحيد... دى لوقتى هو ارجع لدارى

حلمى الوحيد... دلوقتى هو ارجع لدارى

الفصل الثانى

نعمة.. تبكيش يا نعمة

دا الليلة عيد!!

ابوي عطيه شايفاه يا نعمة

جاي من بعيد!!

شايل معاه كسوتنا للعيد الكبير

ما توريهوش دمعتنا تحرق فى غطان الشعير

ما خلاص يا سلمى

دا انا من زمان مستنياه

ونفسى اشوفه داخل علينا واخوى معاه

عايزينه يا اختى يجينا من غير الكساوى

وامى الحزينة ع العتب مستنياه

مستنية الليل اللى يرجع
يُحضنُ عيوننا فى سماه
ويلم شمل الكل
فى الصبح للى نوروف ضحاه
ييجى ابوى من بلاد العرب
يفتح باب ديارنا وفى الصلاة
يفرش له سجادة طويلة
على أرض غيظنا اللى اشتراه
على أرضنا اللى واحشها عرقه
ينز ينزل يسقى أرضنا من شقاه
ويبل ريق النخل
اللى فى جريده الحب تاه
الأم تنده...
عينى الشمال بتعرف يا بناتى الحقونى
قلبي اتقبض على ابوكو.. ما تخيب عيونى

القطر ماشى والا دى نارع القضيب
صَحَى بلدنا النايمة تطلع للهب
الساعة واحدة وبعد نص الليل تغيب
وبعد بكرة الوقفة.. وقفة يوم عصيب
مالهمش بخت يعيدوا شُفّت النصيب
سالم يقول:
الناس حلاوة روح بترمى نفسها فى النار
كامل يرد:

المية جنب القطر تلمع بالشرار
والكل ينظر نظرة واحدة وف سؤال
اللى نجى بنفسه شهيد والّا انتحار؟
والدهشة تفر من العينين تتبدّل الأنظار
وتخش جوه مذابح الناس والقطار
مين اللى عمره طويل...
دلوقتى يظهر م الفرار

مين اللى قلبه ثقيل ؟ ينط بجذ ومش هزار
مسكين يدخل راسه م الشباك...
يلاقىها ف حصار
غلبان بيجرى م التعب يسقط عليه الكل سار
مذهول ينط من الببيان خايف...
يضيع وسط الغبار
من كل ناحية النار بتاكل...
فى اللى نايم واللى طار
والنور يطفى م الحريقة تولع النار بالشرار
وفى ناس تقول عايزين نعيد...
وناس تقول بلاش عيد
بس نطلع م المزار!!
ومشاىخ شعرهم أبيض
بيدعوا.. استرها يا ستار
والجسم فوقه ألف جسم..

اللى فوقيهـم ضهره سـاح
ويموت صاحبنـا فى القـرار
وعيال بصوت مدبـوح.. بتصرخ
وزيهم نشف الخضار!!
وكان حمام ع السكة نايم بالنهار
والليلة طار...

الفصل الثالث

روح يا عامر بلغ الناس والجماعة
قطر الغلابة لسة فاضل له ساعة
ازاى يا عم.. فاضل له ساعة؟
والوقت عدى من زمان؟
والناس بتنزل ليها ساعة
واخوى عطية ما شايفه بان؟

وع المحطة يذيع رنين
إن الغلبة متأخرين
عامر يقول بصوت حزين
القطر واحد من سنين؟
الناس تقول...
أحنا نجينا بقدرة الله العظيم
فصلونا منهم
والنار بتاكل فى الغلبة الضعفانين
قالوا بابور وشرايطه دول كانوا السبب!!
قالوا انفجار أنبوب الشاى والطلب!!
قالوا مقشات المكائن عملت لهب!!
قلنا قضاء الله يغلب.. من غلب
سابق نبينا عليك ما تقول لأهلينا
ما تخلقى دموع الناس تملأ سواقينا
ما تخلقى جبال الحزن تنزل على «أمينة»

ازای ما اقولش وانا من حشای متکاد
والکل محتار اللى دبّر مین واللى کاد؟
والخصم غدار والرب عالم بالعباد
ارهاب یخرب والا عمر الناس معاد
وزی کل قضية بتهز الوطن وبلاد
جهلوا اللى فاعل وفعله فی القلوب جلاد
وقبل اذان الديك ع السطوح ببوح
صوت الغلابة م العیاط... مدبوح
تسمع أمینه ام العیال... وتروح
تقول بصوت الحزن.. صرخة أم تبکی تنوح
راحوا الحبايب غرقوا ف بحور الهم
فاتتهم سفينة نوح!!
والا السفينة خدته طمنی یا منصوح
نفسی.. أشوف ولدی اللى كان مستنى ینجح
نفسی اللى جاى م الغریة جوة بلاده یلاقى مطرح

كلمة فرح بالعيد خلاص دلوقتى تسمح
يا دموع اللى غايب جوة ننى العين بتسرح
يابعاد الحبايب جُوه حُزن القلب يجرح
يا خسارة الغربة الطويلة اللى ما تفرح
ولدى وابو عيالى يروحوا ف ليلة وحدة
كان اهون لى اموت انا قبل ما اعرف مرة وحدة
مرارة المرُ التّقىل اللى اسمه وحدة
على عيني يا ابنى ظُلمنا لأبوك «عطية»
سبناه يسافر فى بلاد بعيدة زمان على
دا انا كنت افكر انه يجى....
ينور البيت ف ضلامه...
ويعمر الدار اللى تفتح له بيبانه
والكل كان يسأل علينا زمان عشانه
دلوقتى من غيره شوكتنا هتعمل ايه
فى الزمن اللى فيه الديب قوام ياكل عياله

على عيني يا ابني ظلمنا لأبوك عطية
سبناه يسافر ف بلاد بعيدة زمان على
ولما حبّ يجينا.. يفرح له شويه
بخلوا عليه الناس وقالوا يموت ضحية
دى الغربية تربة يا ولدى وماليها دية
دى الغربية تربة يا ولدى وماليها دية

القصيدة الفائزة
بالمركز التاسع

قدر بحار

يزيد يوسف ثابت

قدر بحار

انا كنت ف يوم ماشى
انا جى الليل وأسراره
وكانت قمره على بختى
بنورها ماشية قدامى
ونسمة حلوة شدتنى
لبحر هواك وشطآنه
وقلت يا قلبى مين يدري
تلاقى مرسى ترتاح له
وانا بحار ومش خايف
واخاف من ايه.... ما دام الدفة فى ايدى
فردت شراعى... احوش النسمة بأيدى
ونظرة منك سحرتنى.. وكانت موجه شدتنى
مالقتش الدفه يا عنى
وانا بحار ومش خايف
وقلت أعوم وانا ويختى

لمرسى يمكن ارتاح له
لقيت المرسى فى هواك... دوامة وموج عالى
ورحت بعيد فى غرامك... اناذى واقول مين يعومنى
وانا البحار بقيت خايف
على قد ما اقدر بقيت احاول.. لكن الموجة غلبتنى
ده ذنب ع اللى بنظرتها شدتنى
يا تمد ايدها تنقذنى .
يا تسببىنى اغرق وراح عمرى... فداها
وانا البحار وده قدرى

القصيدة الفائزة
بالمركز العاشر

غنة وطن

محمد عبدالله النويشى

غُنة وطن

دم الشهيد..
يعزف على
وتر الوطن..
يصرخ.. يقول..
يحيا الوطن..
والصرخة تتحول..
غُنا
تصبح نشيد..
غُنه وطن..
رغم الجفا..
رغم الحصار..
الصرخة بتشق
الجدار..
بتَهز بنيان
الحصار..
تصبح رصاصة..
أو حجر..
تصبح نيران..

تصبح دمار..
تصبح نشيد..
غنوه وطن..
تصبح حروف
متجمعة
من كل شق
فى قلب درب
م الدروب
متجمعة
كل القلوب
كل الصبايا
مع الولاد الطيبين..
الى لوطنهم مخلصين
كل الهمم..
متجمعة..
والصرخة بتشق
الحجر..
يحيا الوطن

غنوه وطن..
يهتف رصاص
البندقية
مع الحجر..
دم الشهيد..
ما يروح هدر
من قلب ليل..
يصحا النهار..
ويغنى طير القدس..
مع نور النهار
شمس النهار..
دم الولاد الطيبين..
دم الصغار..
دم الشهيد..
ما يروح هدر
يحيا الشهيد..
يحيا الوطن..

المحتوى

٤	♦ رسالة جمعية الأدباء
٦	♦ تقديم
٧	♦ قصائد على شيخه «الفائز بالمركز الأول»:
٩	- قولى القصايد
١٣	- الرب عمره ما نام
١٥	- طاسة الخضة
١٧	- اقروا فاتحة أمريكانى
٢٣	- خدك يا واد ينباس
٢٥	- خلفه الشياطين
٢٩	♦ قصائد أمل عامر «الفائز بالمركز الثانى»:
٣١	- كواليس
٣٣	- حدوتة
٣٥	- لحظة رجوع
٣٧	- الضفة الثانية من روحى
٤٠	- تنهيدة
٤٢	- دقة قلب
٤٣	- صوت النور

٤٥ منك واليك
٤٧ اليوم
٥١	♦ قصائد محمد صابر مرسى «الفائز بالمركز الثالث»:
٥٣ اثنين
٥٦ الزمن
٦٩ إبداع
٧٣ قابلت رمضان

♦ القصائد الفائزة بالمراكز العشر:

٨١ المركز الأول: «الغسل» - خالد محمود
٨٩ المركز الثاني: «التامنة» - منى هيبة
٩٥ المركز الثالث: «حكاية شندويل» - مأمون كامل
١١٣ المركز الرابع: «يا.. كل أحرار البشر» - سيد القطان
١١٩ المركز الخامس: «السقا مات» - منى هيبة
١٢٥ المركز السادس: «وصلة شجن» - ميرفت على عمر
١٢٩ المركز السابع: «توابيت» - أشرف عبد المنعم
١٣٣ المركز الثامن: «الغربة تربية» - خالد عبدالعزيز
١٥١ المركز التاسع: «قدر بحار» - يزيد يوسف ثابت
١٥٥ المركز العاشر: «غنوة وطن» - محمد عبدالله النويشى

دار النيل

للنشر والطبع والتوزيع

١٢ شارع عبده بدران

م. الباشا - المنيل - القاهرة

ت: ٣٦٢٢٥٧٨

رقم الإيداع:

٢٠٠٤/١١٠١١

الترقيم الدولي:

977-5414- 64-4